

重刊清平縣志

卷六
祭譜暨義舉
公業附

清平縣志

政事部

藝文上

文所以載道也清平孫淮海以理學詞宗崛起前代
生平著作傳爲家寶亦蔚爲國華卷中採錄較夥餘
如感時懷古詠物紀事諸詩文亦皆有以發明邑中
政教之大山水之奇者詞之不可以已也如是夫

明孝宗諭都勻府勅

朕惟都勻遠在貴州東南因無流官撫治徃徃自相
殺奪不得安生而又時出劫掠爲地方之害近因貴

州鎮巡等官奏請特出大師征之既已克平各官奏
如永樂年間事例開設府治州縣銓除流官撫治之
以警其後今從其請設立都勻一府而以新開獨山
麻哈二州清平一縣並舊設都勻邦水平州平浪四
長官司屬其管轄僉舉爾文獻熟知民事諳曉夷情
堪任知府故特升爾往知府事賜以璽書蓋重其任
也夫新府之設與舊郡不同外夷之治與內地殊異
非徒賴汝撫安而實資爾控制爾須深體朕委任之
意稽考制度創造衙門宣布條章立爲一定規模使
後人有所遵守凡府中一應該行之事當備之物合

用之人一一悉如內地若力有不及則度以待時勢
有未可則留以待後順其土俗之宜施以安利之政
歸附者安之使得其所流移者招之使復其業業仍須
時常戒勉所屬土官頭目人等諭以大義開其善端
俾其遵守法度謹守地界辦納糧馬不致臨用有缺
撫恤夷民不許非法虐害如有多娶妾媵以虜奪嫡
爭襲官職及窩隱賊人爲盜分贓者具奏開革改設
流官凡係夷情務要與都勻衛指揮協合議行遇有
漏殄殘賊或生苗竊發即便起調官軍土兵勦捕以
靖地方不許執拘悞事其公差官員人至府但有違

法生事爾卽具實奏聞所屬土流官吏軍民人等敢
有倚勢力濫違法傲慢者爾須嚴加禁革輕則會官
問擬如律照例發落重則奏聞區處爾尤宜廉公仁
恕奉法循理體朝廷一視同仁之心以夷治夷使之
日染月化而皆囿於華夏禮法之中庶稱委任爾其
欽承毋怠毋忽

吏治民瘼疏

明鄒元標給事中

兩廣雲貴吏茲土者悉謂之遠兩廣滇南文物埒中
土俸值稍厚以故人多樂居之惟是貴州僻在亥步
窮處荒茅嵐氣猿獠爲伍士人聞命有投牒不往者
有既赴鬱鬱死者臣請脩言其艱辛之狀臣往見都
勾一驛丞南京人也懸鶉百結乞食道死又有麻哈
等州衙齋荒蕪舉目淒涼而獨山知州吳譽聞者文
學吏事亦自名家夜篝燈同女子守孤印皆含冤被
論去視諸臣餘可知矣臣每撫膺太息曰聖天子明
見萬里外忍使諸臣困至此極耶勞逸不均北門大

夫不免興嗟今之情豈異古耶臣愚謂司銓者宜劑
量其間除方面知府知州知縣外如各衙經歷吏目
等官或升或遷宜以四川湖廣雲南三省人當之蓋
三省風氣接壤視他省稍習如或居官稱職其升遷
視他省量速一年庶幾雨露無不被之澤遠臣無向
隅之泣報禮有不重者未之信也又雲貴二省原無
驛夫以軍爲天道里長遠山勢險峻每夫一名幫貼
數名始得成役晝不得力耕夜不得安枕月支米不
過數斗亦良慘矣國初屯戍額五千名今清平衛不
過二三百人皆何以充今何以耗此其故不難知矣

臣愚謂宜勅該部乘此清閒一洗民間清勾夙弊至
雲貴以軍代夫合無行彼處撫按官乘此清閒悉心
議處以杜後患每月量加月米以恤其苦此永遠能
邇之長策也不然他日有不可知者矣

平定香爐山疏

明鄒文盛巡撫

苗民逆命自古爲然而恃險肆惡於今獨甚倡亂於
阿傍阿階之桀賊蠢動於車碗門樓之諸寨動稱六
十年氣數該然輒以帝同烈故事藉口呼吸之間蟻
聚蜂屯奔跳之際鴟張豕突自清平興隆以及偏鎮
諸徭欲攻阻上京之路由平越新添以及龍貴諸鎮
欲據爲己有之區軍屯財蓄燒劫無遺衛堡城池攻
圍不次嘯聚香爐寨穴敵殺應捕官軍若居民若行
旅殘傷無算若材庄若鎮店搶掠一空稱呼自爲苗
王出入僭乘轎馬惡焰重熾於遠邇兇聲聯絡於蠻

限請兵討罪湖廣交章得旨會師撫征疊舉蓋叛逆
久痼於冥頑顧招安實長乎玩侮大兵壓境猶戕殺
軍職方面厥罪滔天實自絕覆育生成神人共憤征
剿何疑於是預分玉石明示恩威大會三省之兵共
圖萬全之計舍羽翼之羣寨先根據之營壘四面圍
繞五哨夾攻官軍土軍輪番攻擊軍器火器錯雜交
施厚賞激之於前嚴罰懾之於後是以官兵各輸謀
勇共圖成功或造樓接戰或架梯攀登我攻之無間
於晝夜彼禦之莫救乎東西覘其無備之處密爲暗
取之謀一登而戮其梟桀銳鋒已挫再登而斬其首

惡巢穴盡灰種類盡於三登根株不遺一縷軍聲震
地烟焰燭天數十尋巖竈之山一朝失險千百年通
逃之寇一旦誅夷香爐裂摧夷寨震動舉此加彼順
若建瓴圖易先難勢如破竹故傳檄漂壩諸苗輸誠
納款歸我侵疆加兵黎蘭等寨落胆飛魂以次授首
必渠魁之是誅縱脅從而問師雖無敵兵不窮追
功幸有成勲歸破險惟茲賊巢諸夷窺望山名香爐
形如磨盤盤之下壁立四圍堅若金城盤之隅平衍
十頃穩稱巢穴而盤之上則突兀盤旋可望而不可
登賊據此以爲天險人望之以爲虎穴先年賊聚實

厯王師衆至二十三萬營連四十餘里圍之數月竟
至老師而費財得一賊首遽爾班師而報捷是以賊
水竊遭挫衄心常狃於反叛動因小忿弄兵每以前
事爲詞今兵不滿五萬歷時未及三月破先年不能
破之山滅先年不能滅之賊望高往昔威震羣夷皆
皇上聖武布昭乎遐邇英謀妙契乎神人而本兵大
臣與帷幄元老又能運謀指示默申機宜所謂定於
廟廊之上有主其事者故將士得以奮貔貅之勇而
臣等亦得以効犬馬之勞以致有此克捷地方底寧
人民胥慶從事官僚如叅將洛忠都指揮葉盛楊淮

許詔陶霖劉麟祝鎮王璽專統哨軍料敵制勝而叅
將洛忠與委署都指揮楊仁分布撫處尤盡心力副
使李麟叅議蔡朝先同緣事都指揮邵鑑防禦撫捕
久著勞勩督糧有措置之方供軍無缺乏之患貴州
叅政胡濂之勞可錄給軍餉於經過之時防騷擾於
必由之處湖廣叅政張天相僉事汪玉之長可數竄
州見任布政使趙文奎升任布政使陳雍綜理錢糧
區畫維謹見任按察使林長吉都指揮王麟緣事都
指揮潘勲協贊戎務幹理亦勤至如將才宣慰與凡
領征百執事漢土官目或叅謀逐殺或督賊駁奔亦

皆宣力盡勞而不敢有怠焉者也臣等又恐大兵旣
撤漏殄殘賊及新撫夷寨或至乘虛反側議留本省
金輪戍官軍行委叅將等官統領於各該衛堡駐劄
防守會同兵備守巡官將殘破城池關隘逐漸修理
以爲長久之圖遇有殘賊出沒相機追捕以靖地方
初附夷民資助安挿使得生理候至明年三四月間
苗夷旣歸地方無事將前留官軍發回該衛所着伍
差操其舊管下天漂天壩等處黑苗雖經招撫退
回巢穴但性類太乖叛服不常乞勅該部轉行彼處
巡撫巡按督行該道守巡官嚴督播州宣慰楊斌責

令該管會官不時撫諭不許仍前越境侵占貽患地方除官軍人等獲到功次該巡按紀功御史宜照造冊及將僭王首惡阿傍等會審明白各令具奏軍中用過錢糧等項行布政使造冊徑繳該部查照已於本年十二月二十一日班師外緣係捷音事理具本專差將才指揮余大綸奏